

# Héroenan Dj'awendia

"Awor òf nunca," e propaganda ta anunsiá. "Michael Jackson asina serka, Gara e chèns aki!!" Djabièrnè awor porfin, e dia tan sperá ta yega; e dia ku Michael Jackson, komo un parti di su "Dangerous World Tour," lo tin e konsierto tan antisipá! I e biaha aki, su shou ta den nos serkania, na Caracas!

Pepsi a usa e okashon pa promové tantu su produkto i komo su promotor ku un sorteo. E promé tres premio ta konsistí di un pasashi, impuesto di aeropuerto, hotèl pa dos anochi, transporte, i entrada pa e konsierto...gratis!

Otronan ta dispuesto pa "gara e chèns aki" i paga fl. 99,-- pa para pa durashon di e konsierto, un shou di dos ora i binti minüt. Esnan ku ke sinta, tin ku paga fl. 140,-- adishonal!

Ora Jackson a laga sa ku e ke pasa un anochi na Kòrsou pa evitá e aire na Venezuela ku e ta konsiderá demasiado kontaminá pa su kútis delikado, esei kasi a start un guera. Hoteleronan a bringa pa e artista lo por hospedá na nan hotèl. I Aruba a bringa p'e pasa anochi na nan isla, na lugá di Kòrsou.

Hende ta buska un héroe, un pèrsona ku nan por admirá komo un modelo ideal i sigui su ehèmpel. I hende kasi por bira loko, hasi kiko ku ta, paga kuantu ku ta, pa nan por "adorá" nan héroe. E nòmber por varia (Michael Jordan, Bob Marley, Madonna), ma kasi sèmper e ídolonan dj'awendia riba tishùrt, pèchi, kadena, kèts, CD ta un kantante, artista di sine, òf un deportista. Ta bisá ku e héroenan di un pueblo, esnan ku nos ta admirá i ta pone komo ehèmpelnan pa nos imitá, ta indiká ki direkshon e pueblo lo kana. Beibel ta bisa, "Esun ku kana ku hendenan sabí lo ta sabí, ma e kompañero di bobonan lo sufri daño" (Proverbionan 13:20). Maske nos no konosé nos héroenan pèrsonal, tòg nos ta anda ku nan regularmente. Nos ta memorisá nan kansionnan, ta kana ku nan potrèt, ta wak nan pelikulanen, ta aktua, ta bisti, i ta peñada méskos ku nan.

Ma lástima, awendia hopi di esnan ku nos ta admirá komo modelonan ideal, nos héroenan, ta hende ku Dios ta yama "bobonan" moral. I mas tristu ta ku nos (i nos yunan) ku ta admirá nan, ta sigui nan lasternan.

Ora bida sekreto di un di nos héroenan ta sali na kla, tin ora nos ta haña sa ku e ta usa droga. Hopi bes e matrimonionan di nos ídolonan ta un desaster. Kisas nan a kasa tres, kuater, i muchu mas biaha. Ki tipo di ehèmpel esei ta?

Tres luna pasá, Heidi Fleiss, un muhé ku a regla kontaktonan amoroso ku prostitutanen úniko pa \$1.500, tabata arestá. Artistanan di sine na Hollywood, nos ídolonan, a keda morto spantá ku e grabashonnan sekretu di Heidi su kombersashonnan telefóniko lo revelá nan pikánan sekreto!

Tin ora nos héroenan ta usa nan popularidat pa dañá bida di un mucha muhé ku nan fantasianan seksual. Rock Hudson a muri di AIDS algun aña pasá i Magic Johnson ta riba e mésun kamina, infektá ku e viro HIV. Eseinan ta bidanan pa admirá i imitá?

I kiko di lokual nan ta komuniká dor di nan kansionnan i pelikulanen? Nos ta aseptá e kansion sin evaluá e palabranan djis pasobra e ta kantá pa nos ídolo. Pasobra nos ta apresiá sierto aktor; e moralidat di su pelikula no ta importá.

Evaluá bo héroenan. Analisá kiko nan ta representá i kiko nan ta komuniká. E kantante, aktris, òf deportista popular ta hiba e tipo di bida ku bo ke pa bo yunan imitá?

Tantu biaha e héroenan popular dj'awendia ta laga hopi di deseá. Nos tin mester di un otro klase di hende ku nos ta admirá i imitá! Mihó nos tuma komo nos héroe òf heroína hende ku maske nan tin nan fayonan, tòg tin bidanan ehemplar. Mihó nos kana ku flanèl di Mama Teresa na lugá di Madonna. Un pèchi ku firma di Billy Graham lo ta muchu mas apropiá ku un kadena di Bob Marley òf kèts di Michael Jordan.

I ken por argumentá kontra e ehèmpel supremo, Hesus? No tin un mihó héroe pa nos era ku Kristo! Di bèrdat, E ta e úniko Pèrsona ideal, e úniko ehèmpel pèrferkto, e úniko ku nos por admirá i nunca haña un fayó den djE! Beibel ta bisa ku Kristo a laga "un ehèmpel pa boso, pa boso por sigui Su lasternan" (1 Pedro 2:21). E ta e úniko Héroe pèrferkto, tantu di pasado komo dj'awendia!